

第一冊 第二課 鉛筆盒仔

〈阿爸畫圖〉

口白：丸仔佇客廳寫功課。丸仔的鉛筆斷去矣。

丸仔：阿母，你敢會使用刀仔共我的鉛筆削予尖。

阿母：好啊，毋是阿母咧便所彈吉他，阿母削鉛筆的功夫是通人呵佬喔。

丸仔：阿母，你拄才講便所彈吉他，是啥物意思啊？

阿母：這句話喔是咧講人愛臭彈啦。

丸仔：按呢阿兄上愛便所彈吉他。

口白：豆仔拄仔好對便所行出來。

豆仔：丸仔，我根本就無佇便所彈吉他，你莫烏白講喔。

丸仔：我是咧講你愛臭彈啦。

豆仔：丸仔，你臭彈的功夫嘛袂輸我喔。真正是有喙講別人，無喙講家己。

阿母：好矣啦，恁兩個人莫閣答喙鼓矣。來，丸仔，提去。

丸仔：哇，阿母，這幾枝鉛筆削了有夠嬌的。

豆仔：有影就著。

(阿爸行過來)

丸仔：阿爸，你敢會曉畫圖？

阿爸：我當然嘛會曉畫圖啊。

豆仔：若按呢，你畫予我看覓咧。

阿爸：無問題。畫好矣，恁臆看覓這是啥物？

丸仔：這……敢是狗仔。

阿母：應該是鳥仔。

豆仔：毋是，是一隻蟲。

阿爸：毋是啦，是魚仔。

阿母、豆仔、丸仔：魚仔。

阿爸：恁乎，連魚仔攏看袂出來。

阿母：可能是你用鉛筆畫，阮看袂清楚啦。

豆仔：用彩色筆畫，看起來較清楚。

(阿爸閣畫一張圖)

阿爸：好，我閣予恁一擺機會，恁愛斟酌看喔。

豆仔：我知，我知，是魚仔。

阿母：毋是魚仔，是貓仔。

丸仔：毋是啦，是鴨仔。著無，阿爸？

阿爸：奇怪呢，我遮~~勢~~^勢畫圖，恁竟然攏臆無。

阿母、豆仔、丸仔：你到底咧畫啥？

阿爸：一下看就知影，我畫的是豬仔。

阿母、豆仔、丸仔：豬仔

丸仔：我看阿爸才是，便所彈吉他。

阿母：真正有夠臭彈呢。

【講看覓】

第一、便所彈吉他是啥物意思？

第二、阿爸有用著啥物筆來畫圖？